

啼鳥

- 1 窮山候至陽氣生
- 2 百物如與時節爭
- 3 官居荒涼草樹密
- 4 撩亂紅紫開繁英
- 5 花深葉暗耀朝日
- 6 日暖衆鳥皆嚶鳴
- 7 鳥言我豈解爾意
- 8 綿蠻但愛聲可聽
- 9 南窗睡多春正美
- 10 百舌未曉催天明
- 11 黃鸝顏色已可愛
- 12 舌端啞咤如嬌嬰
- 13 竹林靜啼青竹筍
- 14 深處不見惟聞聲
- 15 陂田遶郭白水滿
- 16 戴勝穀穀催春耕
- 17 誰謂鳴鳩拙無用
- 18 雄雌各自知陰晴
- 19 雨聲蕭蕭泥滑滑
- 20 草深苔綠無人行
- 21 獨有花上提葫蘆
- 22 勸我沽酒花前傾
- 23 其餘百種各嘲哂
- 24 異鄉殊俗難知名
- 25 我遭讒口身落此
- 26 每聞巧舌宜可憎
- 27 春到山城苦寂寞
- 28 把盞常恨無娉婷
- 29 花開鳥語輒自醉
- 30 醉與花鳥爲交朋
- 31 花能嫣然顧我笑
- 32 鳥勸我飲非無情
- 33 身閑酒美惜光景
- 34 惟恐鳥散花飄零
- 35 可笑靈均楚澤畔
- 36 離騷憔悴愁獨醒

歐陽脩